

gagné premièrement la fille à Dieu, puis vn sien fils encore plus aagé; enfin la mere a voulu fuiure ses enfans, & viuent tous dans vne douceur d'innocence qui se rendroit aimable au milieu de la France.

A peine y auoit-il trois iours qu'une famille entiere auoit pris resolution d'embrasser la Foy, que la maistresse de la cabane trauaillant en plein midy en son [42] champ avec vne de ses nieces, deux Iroquois cachez là proche dans les bois fortirent de leurs embusches, & à la veuë de tout le monde se ietterent sur elles à coups de hache, leur enleuent la cheuelure & la peau de la teste, & ayans fait leur coup se retirent à la fuite avec tant de viteffe que iamais on ne pût les atteindre. On vient de trois lieuës nous querir en haste; nous y courons de mesme pas assez à temps pour mettre ces pauures femmes maffacrées dans le chemin du Paradis. Ce font là, disoit l'une, les pensées que j'auois dans mon champ, ie desirois d'aller au Ciel, & Dieu m'a prise au mot: ie voulois viure, & maintenant ie veux mourir Chrestienne, ne me refusez pas le Baptisme. Celle-cy en a réchappé, & du depuis s'est tousiours comportée tres-Chrestienne-ment, l'autre fut bien tost dans le Ciel.

Vne ieune femme Neophyte sentât en ses premières couches de cruelles tranchées n'auoit recours qu'à Dieu, ses douleurs redoublant elle redouble ses prieres, & se deliure enfin tres-heureusement de son fruit à mesme temps qu'elle acheue [43] son chapelet. Après six iours elle se sent réueillée subitement au milieu de la nuit, & trouue son enfant qui tiroit à la fin, desia saisi d'une froideur mortelle: sans songer à aucun remede, Helas! il meurt sans estre baptisé, s'écrie cette pauure mere desolée, il n'ira pas dedans